



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr. _____ datë _____, 2021

PËR

KRITERET, MËNYRËN E SHPËRBLIMIT DHE TRAJTIMIN E SPORTISTËVE, QË PËRFITOJNË STATUSIN E NIVELIT TË LARTË, DHE TRAJNERËVE TË TYRE

Në mbështetje të nenit 100 të Kushtetutës dhe të pikës 5, të nenit 27, të ligjit nr. 79/2017, “Për sportin”, i ndryshuar, me propozimin e ministrit të Arsimit, Sportit dhe Rinisë, Këshilli i Ministrave,

VENDOSI:

1. Kriteria për përfitimin e statusit të nivelit të lartë janë rezultatet në veprimtaritë ndërkombëtare apo kombëtare, sipas tabelave I dhe II, që i bashkëlidhen këtij vendimi dhe janë pjesë përbërëse e tij.
2. Sportistët mbajnë statusin e nivelit të lartë nga momenti i marrjes së rezultatit zyrtar në veprimtaritë ndërkombëtare apo kombëtare, deri në marrjen zyrtare të rezultatit nga një sportist tjetër pasardhës, në atë sport.
3. Sportistët që gëzojnë statusin e nivelit të lartë përfitojnë shpërblim dhe trajtim, sipas përcaktimeve të bëra në këtë vendim.
4. Integrimi i sportistëve në sistemin arsimor me drejtim sportiv, sigurisë kombëtare dhe mbrojtjes dhe punësimi i tyre në strukturat e Ministrisë së Mbrojtjes dhe Ministrisë së Brendshme, përfitohet vetëm një herë, brenda periudhës së përcaktuar në pikën 2 të këtij vendimi.
5. Sportistët e sporteve individuale, të kategorive “të rritur” dhe “të rinj”, që arrijnë rezultate në veprimtaritë ndërkombëtare, sipas tabelës I, shpërblehen pas shpalljes së rezultateve përfundimtare zyrtare nga federata ndërkombëtare e atij sporti. Sportistët e kategorisë “të rinj” shpërblehen në masën 30% të vlerës së përcaktuar për kategorinë “të rritur”.
6. Sportistët e sporteve individuale, të kategorisë “të rritur”, që arrijnë rezultate në veprimtaritë kombëtare, sipas tabelës II, shpërblehen pas shpalljes së rezultateve përfundimtare zyrtare nga federata shqiptare e atij sporti.
7. Sportistët e kategorisë më të lartë në sportet kolektive, që arrijnë vendin e parë në kampionatin kombëtar, sipas tabelës II, shpërblehen pas shpalljes së rezultateve zyrtare nga federata shqiptare e atij sporti.
8. Trajnerët e sportistëve që kanë përfituar statusin e nivelit të lartë, sipas këtij vendimi,

shpërblehen në masën 40% të vlerës që përfiton sportisti me këtë status.

9. Për shpërblimin financiar dhe trajtimin e sportistit të nivelit të lartë, për sportet individuale, që kanë marrë rezultate në veprimtaritë ndërkombëtare, sipas tabelës I, federata sportive përkatëse, paraqet kërkesën pranë ministrisë përgjegjëse për sportin. Të drejtën për të paraqitur kërkesë e ka edhe sportisti apo trajneri i tij. Kërkesa shoqërohet me rezultatin përfundimtar të analizave doping, referuar veprimtarisë ndërkombëtare, në të cilën sportisti ka marrë rezultatin. Ministria përgjegjëse për sportin verifikon përmbushjen e kriterëve pas marrjes së kërkesës. Fondet alokohen për llogari, të sportistit dhe të trajnerit të tij.
10. Për shpërblimin financiar dhe trajtimin e sportistit të nivelit të lartë, për sportet individuale, apo ekipit sportiv, për sportet kolektive, që kanë marrë e vendit të parë në kampionatin kombëtar, organizata sportive përkatëse, që ushtron veprimtarinë në territorin e njësisë së vetëqeverisjes vendore, paraqet kërkesën pranë saj. Të drejtën për të paraqitur kërkesë e ka edhe sportisti apo trajneri i tij. Kërkesa shoqërohet me rezultatin përfundimtar të federatës shqiptare të atij sporti, referuar kampionatit kombëtar, në të cilin sportisti apo ekipi sportiv ka marrë vendin e parë. Njësia e vetëqeverisjes vendore verifikon përmbushjen e kriterëve pas marrjes së kërkesës. Fondet alokohen për organizatën sportive të sportistit/ekipit sportiv dhe trajnerit të tij, për llogari të këtyre të fundit.
11. Sportistët e nivelit të lartë dhe trajnerët e tyre, pjesëmarrës në veprimtaritë kombëtare, të përcaktuara në rregulloret e federatave sportive përkatëse dhe në veprimtari ndërkombëtare, për përgatitjen e tyre përfitojnë trajtim ushqimor në natyrë ose në vlerë, si dhe trajtim mjekësor.
12. Trajtimi ushqimor është jo më pak se 2 500 (dymijë e pesëqind) lekë në ditë, për 25 (njëzet e pesë) ditë në muaj.
13. Trajtimi ushqimor dhe mjekësor për periudhën e grumbullimit dhe të pjesëmarrjes në veprimtaritë ndërkombëtare zyrtare të sportistit, në përbërje të ekipit përfaqësues kombëtar, mbulohet nga federata sportive përkatëse.
14. Gjatë vitit kalendarik, përjashtuar periudhën e grumbullimit dhe të pjesëmarrjes në veprimtaritë ndërkombëtare zyrtare të sportistit, sportisti dhe trajneri i tij përfitojnë trajtim ushqimor dhe mjekësor për përgatitjen sportive dhe pjesëmarrjen në veprimtaritë kombëtare zyrtare. Ky trajtim ushqimor dhe mjekësor mbulohet nga fondet e njësive të vetëqeverisjes vendore, ose të ardhura të tjera të ligjshme.
15. Shpenzimet për trajtimin mjekësor vlerësohen sipas dokumenteve justifikuese, për periudhën e trajtimit.
16. Efektet financiare për shpërblimin dhe trajtimin e sportistëve të nivelit të lartë dhe trajnerëve të tyre, në sportet individuale, që arrijnë rezultate në veprimtaritë ndërkombëtare, sipas tabelës I, përballohen nga fondet e buxhetit të shtetit, miratuar për ministrinë përgjegjëse për sportin.
17. Efektet financiare për shpërblimin dhe trajtimin e sportistëve të nivelit të lartë dhe trajnerëve të tyre, që arrijnë rezultate në veprimtaritë kombëtare, sipas tabelës II, përballohen nga fondet e njësive të vetëqeverisjes vendore.
18. Sportistët, të cilët kanë përfituar statusin e nivelit të lartë, pas hyrjes në fuqi të ligjit nr. 105/2020 "Për disa shtesa dhe ndryshime në ligjin nr. 79/2017 "Për sportin", trajtohen sipas parashikimeve të këtij vendimi.
19. Vendimi nr. 687, datë 14.11.2018, i Këshillit të Ministrave, "Për kriteret, mënyrën e shpërblimit

dhe përfitimin e trajtimit për përgatitjen sportive të sportistëve, që përfitojnë statusin e nivelit të lartë”, shfuqizohet.

20. Ngarkohen Ministria e Arsimit, Sportit dhe Rinisë, Ministria e Brendshme, Ministria e Mbrojtjes, njësitë e vetëqeverisjes vendore dhe organizatat sportive shqiptare, për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

EDI RAMA

Tabela I

VEPRIMTARITË NDËRKOMBËTARE ZYRTARE

Rekord olimpik		15 000 000 lekë
Rekord botëror		15 000 000 lekë
Rekord evropian		6 000 000 lekë
Rekord mesdhetar		3 000 000 lekë
Rekord ballkanik		1 500 000 lekë
Lojëra olimpike	Vendi i parë	10 000 000 lekë
Lojëra olimpike	Vendi i dytë	7 000 000 lekë
Lojëra olimpike	Vendi i tretë	5 000 000 lekë
Lojëra olimpike	Vendi i katërt	3 000 000 lekë
Lojëra olimpike	Vendi i pestë	2 000 000 lekë
Lojëra olimpike	Vendi i gjashtë	1 000 000 lekë
Lojëra olimpike	Vendi i shtatë	800 000 lekë
Lojëra olimpike	Vendi i tetë	500 000 lekë
Kampionat botëror	Vendi i parë	10 000 000 lekë
Kampionat botëror	Vendi i dytë	6 000 000 lekë
Kampionat botëror	Vendi i tretë	4 000 000 lekë
Kampionat botëror	Vendi i katërt	2 000 000 lekë
Kampionat botëror	Vendi i pestë	1 000 000 lekë
Kampionat botëror	Vendi i gjashtë	800 000 lekë
Kampionat botëror	Vendi i shtatë	600 000 lekë
Kampionat botëror	Vendi i tetë	400 000 lekë
Kampionat evropian	Vendi i parë	4 000 000 lekë
Kampionat evropian	Vendi i dytë	2 000 000 lekë
Kampionat evropian	Vendi i tretë	1 000 000 lekë
Kampionat evropian	Vendi i katërt	800 000 lekë
Kampionat evropian	Vendi i pestë	600 000 lekë
Kampionat evropian	Vendi i gjashtë	400 000 lekë
Lojërat Mesdhetare	Vendi i parë	2 000 000 lekë
Lojërat Mesdhetare	Vendi i dytë	1 000 000 lekë
Lojërat Mesdhetare	Vendi i tretë	800 000 lekë
Kampionati Ballkanik	Vendi i parë	1 000 000 lekë

Tabela II

VEPRIMTARITË KOMBËTARE ZYRTARE

Rekord kombëtar		200 000 lekë
Kampionati kombëtar në sportet individuale	Vendi i parë	100 000 lekë
Kampionati kombëtar i kategorisë më të lartë në sportet kolektive	Vendi i parë	500 000 lekë